

御纂醫宗金鑑卷七

訂正仲景全書傷寒論註少陰全篇目錄

麻黃附子細辛湯

麻黃附子甘草湯

附子湯

四逆湯

白通湯

白通加豬膽汁湯

真武湯

通脈四逆湯

吳茱萸湯

四逆散

黃連阿膠湯

豬膚湯

甘草湯

桔梗湯

半夏散及湯

苦酒湯

桃花湯

御纂醫宗金鑑卷七

訂正仲景全書傷寒論註

辨少陰病脈證并治全篇

少陰腎經水火之藏邪傷其經隨人虛實或從水化以爲寒或從火化以爲熱水化爲陰寒之邪是其本也火化爲陽熱之邪是其標也陰邪其脈沉細而微陽邪其脈沉細而數至其見證亦各有別陰邪但欲寐身無熱陽邪雖欲寐則多心煩陰邪背惡寒口中和陽

邪背惡寒則口中燥陰邪咽痛不腫陽邪咽
痛則腫陰邪腹痛下利清穀陽邪腹痛下利
清水或便膿血也陰邪外熱面色赤裏寒大
便利小便白陽邪外寒手足厥裏熱大便秘
小便赤此少陰標本寒熱之証也凡從本
之治均宜溫寒回陽從標之治均宜攻熱救
陰回陽救陰其機甚微總在臨證詳究辨別
標本寒熱以急施其治庶克有濟稍緩則不
及矣

少陰之爲病脈微細但欲寐也

註

少陰腎經陰盛之藏也少陰受邪則陽氣微故脈微細也衛氣行陽則寤行陰則寐少陰受邪則陰盛而行陰者多故但欲寐也此少陰病之提綱後凡稱少陰病者皆指此脈證而言也

集註

方有執曰少陰腎經也居於極下其脈起於小趾之下靈樞曰是主所生病者嗜臥但欲寐蓋人肖天地天地之氣行於陽則闢而曉

行於陰則闔而夜故人之氣行於陽則動而寤行於陰則靜而寐凡病人但欲寐者邪客於陰故也

張璐曰此言少陰之總脈總證也蓋少陰屬水主靜即使熱邪傳至其經在先之脈雖浮大此時亦必變爲沉緇在先之證雖煩熱不寧此時亦必變爲昏沉嗜臥但須辨出脈細沉數口中燥爲熱證脈沉微細口中和爲寒證以此明辨萬無差誤矣

程應旄曰凡陰脈皆沉異乎太陽之浮不必言矣陽明脈大微者大之反少陽脈弦細者弦之反沉兼微細陰證定矣

少陰病始得之反發熱脈沉者麻黃附子細辛湯主之

註

少陰病謂但欲寐也脈沉者謂脈不微細而沉也今始得之當不發熱而反發熱者是爲少陰之裏寒兼有太陽之表熱也故宜麻黃附子細辛湯溫中發汗顧及其陽則兩感之

寒邪均得而解之矣

集註

方有執曰發熱邪在表也衄沉少陰位北而居裏也以其居裏邪在表而發熱故曰反也以邪在表不在裏故用麻黃以發之以其本陰而標寒故用附子以溫之細辛辛溫通於少陰用之以佐主治者以其專經而爲向導也

程知曰三陰表法與三陽不同三陰必以溫經之藥爲表而少陰尤爲緊關故用散邪溫

經之劑俾外邪之深入者可出而內陽亦不
因之外越也

程應旌曰一起病便發熱兼以陰經無汗世
有計日按證者類能用麻黃而忌在附子不
知脈沉者由其人腎經素寒裏陽不能協應
故沉而不能浮也沉屬少陰不可發汗而始
得病時卽發熱則兼太陽又不得不發汗須
以附子溫經助陽托住其裏使陽不至隨汗
而越其麻黃始可合細辛用耳

林瀾曰傳邪與陰寒皆有沉脈沉但可為病
之在裏而未可專以沉為寒也夫少陰證中
微細而沉與細數而沉其為寒熱之殊蓋大
有別矣

麻黃附子細辛湯方

麻黃

二兩
去節

細辛

二兩

附子

一枚炮去
皮破八片

右三味以水一斗先煮麻黃減二升去上沫

內諸藥煮取三升去滓溫服一升日三服

少陰病得之二三日麻黃附子甘草湯微發汗以
二三日無裏證故微發汗也

註

此詳上條少陰病得之二三日仍軀沉發熱
不解者宜麻黃附子甘草湯微發其汗也蓋
謂二三日不見吐利裏寒之證知邪已衰然
熱仍在外尙當汗之但不可過耳故不用細
辛而用甘草蓋于溫散之中有和意也此二
證皆未曰無汗非仲景畧之也以陰不得有
汗不須言也

集註

張璐曰少陰無發汗之法汗之必至亡陽惟此一證其外有太陽發熱無汗其內不吐利躁煩嘔渴乃可溫經散寒取其微似之汗也程應旄曰旣云微發汗矣仍用以字故字推原之足見鄭重之意按此二條與太陽篇發熱頭痛脈沉用四逆者同一證彼以不差則期過三日可知病已入裏雖尙冒太陽頭痛直以少陰法律之此少陰病在初得二三日雖無頭痛證不容竟作少陰治之故仍兼太

陽之法以律之一出一入不啻爰書假令前
條得之二三日後二條過二三日不差則四
逆之與麻黃易地皆然矣

汪琥曰上條反發熱脈沉此亦反發熱脈沉
但上言始得之為急此言得之二三日為緩
病勢稍緩治法亦緩

麻黃附子甘草湯方

麻黃

二兩
去節

附子

一枚炮去
皮破八片

甘草

二兩
炙

右三味以水七升先煮麻黃一兩沸去上沫
內諸藥煮取三升去滓溫服一升日三服

集解

柯琴曰彼太陽病而脈反沉便用四逆以急
救其裏是裏寒陰盛也此少陰脈而表反熱
便於表劑中加附子以預固其陽是表熱陽
衰也夫以發熱無汗太陽之表脈沉但欲寐
少陰之裏設用麻黃開腠理細辛散浮熱而
無附子以固元陽則太陽之微陽外亡惟附
子與麻黃並用則寒邪散而陽不亡此裏病

及表脈沉而當發汗者與病在表脈浮而發汗者逕庭也若表微熱則受寒亦輕故以甘草易細辛而微發其汗甘以緩之與辛以散之者又少間矣

少陰病脈微不可發汗亡陽故也陽已虛尺脈弱瀉者復不可下之

註

少陰病脈微雖有發熱亦爲少陰裏寒外熱非太陽發熱者可比故不可發汗發汗則亡

陽然陽已虛津液已涸卽見少陰口燥咽乾

可下之證若尺脈弱濇者復不可下之又恐
亡陰也

集註

方有執曰微者陽氣不充故曰無陽無陽則
化不行故汗不可發也尺以候陰弱濇者陰
血不足也故謂復不可下其當亟行溫補又
可知矣

程應旄曰少陰多自利證人固無肯輕下者
但拈出尺脈弱濇字則少陰之有大承氣湯
證其尺脈必強而滑已伏見於此處矣

病人衄陰陽俱緊反汗出者亡陽也此屬少陰法
當咽痛而復吐利

註

病人衄陰陽俱緊發熱無汗者太陽傷寒證
也發熱汗出不止者太陽亡陽證也今衄緊
無熱而反汗出此屬少陰然少陰證法當咽
痛而復吐利也上條衄微無汗不可發汗者
是以衄為主也此條有汗衄緊不可發汗者
是以證為主也從衄從證不可不察

集註

程知曰陰陽俱緊傷寒之衄也法當無汗而

反汗出太陽之陽外亡也若以少陰亡陽之證而認爲太陽中風之證則誤矣少陰之寒上逼則咽痛而吐下逼則下利也

少陰病脈緊至七八日自下利脈暴微手足反溫脈緊反去者爲欲解也雖煩下利必自愈

註

此承上條互發其義以別陰陽寒熱也少陰病脈沉微細寒邪脈也脈沉數細熱邪脈也若脈緊汗出是少陰寒虛證也今脈緊無汗

乃少陰寒實證也因循至七八日之久而自

下利若寒實解則脈必緊去而暴微其證必
手足由冷而反溫是知邪隨利去爲欲解也
故此時雖煩下利乃陰退陽回故知其必自
愈也

集註

方有執曰緊寒邪也自下利脈暴微者陰寒
內瀉也故謂手足爲反溫言陽回也陽回則
陰退故謂緊反去爲欲解也夫寒邪在陰而
脈緊得自利脈暴微手足溫緊去爲欲解者
猶之邪在陽脈數而熱得汗出脈和身涼數

去爲欲愈之意同陰陽勝復之機也

程應旄曰衄於利後頓變緊而爲微手足於利後變不溫而爲溫則微非諸微亡陽之微乃緊去人安之微蓋以從前之寒已從下利而去故陽氣得回而欲解也雖煩下利必自愈

少陰病得之一二日口中和其背惡寒者當灸之
附子湯主之

註背惡寒爲陰陽俱有之證如陽明病無大熱

口燥渴心煩背微惡寒者乃白虎加人參湯
證也今少陰病但欲寐得之二三日口中不
燥而和其背惡寒者乃少陰陽虛之背惡寒
非陽明熱蒸之背惡寒也故當灸之更主以
附子湯以助陽消陰也口燥口和誠二者之
確徵矣

集註

程知曰言初得之證口中和不渴不燥全無
裏熱也內經曰背爲陽背惡寒則陽虛陰盛
寒深可知若風寒在表而惡寒則一身盡寒

矣灸之以助陽消陰與附子湯以溫經散寒
論中云傷寒無大熱口燥渴心煩背微惡寒
者白虎湯加人參主之彼是陽熱乘陰虛而
內陷之惡寒與此之陰寒盛者不同陽入陰
者則口燥心煩陰寒盛者則不能銷鑠津液
故口中和

張璐曰太陽表氣大虛邪氣得入犯少陰故
得之一二日尙背惡寒不發熱此陰陽兩虧
較之兩感更自不同兩感表裏皆屬熱邪猶

堪發表攻裏此則內外皆屬虛寒無邪熱可
以攻擊惟當溫經補陽以溫補其不足更灸
關元以協助之雖其證似緩於發熱脈沉而
危殆尤甚焉

汪琥曰此條論仲景不言當灸何穴常器之
云當灸鬲俞關元穴背俞第三行郭雍云此
有錯字當是灸鬲俞關元穴也鬲俞是背俞
第二行穴按鬲俞實係背俞部第二行穴然
常器之所云第三行穴者當是鬲關非鬲俞

也圖經云鬲關二穴在第七椎下兩旁相去
各三寸陷中正坐取之足太陽氣脈所發專
治背惡寒脊強俯仰難可灸五壯蓋少陰中
寒必由太陽而入故宜灸其穴又關元一穴
在腹部中行臍下三寸足三陰任脈之會可
灸百壯常器之所謂灸鬲關者是溫其表以
散外邪灸關元者是溫其裏以助其元氣也
少陰病身體痛手足寒骨節痛脈沉者附子湯主

之

註

此承上條詳舉其證互發其義以出其治也
身體痛表裏俱有之證也如太陽病脈浮發
熱惡寒身痛手足熱骨節痛是爲表寒當主
麻黃湯發表以散其寒今少陰病脈沉無熱
惡寒身痛手足寒骨節痛乃是裏寒故主附
子湯溫裏以散寒也

集註

方有執曰少陰腎也腎主骨寒淫則痛

程應旂曰身體痛手足寒骨節痛太陽傷寒
同有此證也以脈沉辨之沉屬陰寒重著所

致裏陰有餘表陽不足故以附子湯主之

附子湯方

附子

二枚去皮
生破八片

茯苓

三兩

人參

二兩

白朮

四兩

芍藥

三兩

右五味以水八升煮取三升去滓溫服一升

日三服

方解

少陰為寒水之藏故寒傷之重者多入少陰

所以少陰一經最多死證方中君以附子二

枚者取其力之銳且以重其任也生用者一
以壯少火之陽一以散中外之寒則身痛自
止惡寒自除手足自溫矣以人參爲臣者所
以固生氣之原令五藏六府有本十二經脈
有根脈自不沉骨節可和矣更佐白朮以培
土芍藥以平木茯苓以伐水水伐火自旺旺
則陰翳消木平土益安安則水有制制則生
化此誠萬全之術也其有畏而不敢用以致
因循有悞者不誠可惜哉

少陰病脈沉者急溫之宜四逆湯

註

少陰病但欲寐脈沉者若無發熱口燥之證則寒邪已入其藏不須遲疑急溫之以四逆湯消陰助陽可也

集註

吳人駒曰脈沉須別虛實及得病新久若得之多日及沉而實者須從別論

四逆湯方

甘草

二兩
炙

乾薑

一兩
半

附子

一枚生用去
皮破八片

右三味以水三升煮取一升二合去滓分溫再服強人可大附子一枚乾薑三兩

方解

方名四逆者主治少陰中外皆寒四肢厥逆也君以甘草之甘溫溫養陽氣臣以薑附之辛溫助陽勝寒甘草得薑附鼓腎陽溫中寒有水中煖土之功薑附得甘草通關節走四肢有逐陰回陽之力腎陽鼓寒陰消則陽氣外達而脈自升手足自溫矣

集解

汪琥曰少陰病本脈微細但欲寐今輕取之

微衄不見重取之細衄幾亡伏匿而至於沉
此寒邪深入於裏殆將入藏溫之不容以不
急也稍遲則惡寒身踈吐利煩躁不得臥寐
手足逆冷衄不至諸死證立至矣四逆湯之
用可稍緩乎

少陰病下利白通湯主之

註

少陰病但欲寐衄微細已屬陽爲陰困矣更
加以下利恐陰降極陽下脫也故君以葱白
大通其陽而上升佐以薑附急勝其陰而緩

降則未脫之陽可復矣

集註

方有執曰少陰病而加下利者不獨在經而亦在藏寒甚而陰盛也治之以乾薑附子者勝其陰則寒自散也用葱白而曰白通者通其陽則陰自消也

程知曰此言下利宜通其陽也少陰病謂有脈微細欲寐證也少陰下利陰盛之極恐致格陽故用薑附以消陰葱白以升陽通云者一以溫之而令陽氣得入一以發之而令陰

氣易散也

汪琥曰腎虛無火不能主水故下利用白通湯者溫裏以散寒也

白通湯方

葱白 四莖

乾薑 一兩

附子 一枚生去皮破八片

右三味以水三升煮取一升去滓分溫再服

集解

汪琥曰此方與四逆湯相類獨去甘草蓋驅

寒欲其速辛烈之性取其驟發直達下焦故

不欲甘以緩之也而猶重在蒸白少陰之陰
天之寒氣亦爲陰兩陰相合而偏於下利則
與陽氣隔絕不通薑附之力雖能益陽不能
使真陽之氣必入於陰中惟葱白味辛能通
陽氣令陰得陽而利庶可愈矣蓋大辛大熱
之藥不過藉以益人陽氣非有以通之令真
陽和會而何以有濟也耶

少陰病下利脈微者與白通湯利不止厥逆無脈
乾嘔煩者白通加豬膽汁湯主之服湯脈暴出者

死微續者生

註

此承上條詳申其脈以明病進之義也少陰
病下利脈微者與白通湯下利當止今利不
止而轉見厥逆無脈更增乾嘔而煩者此陰
寒盛極格陽欲脫之候也若喘以熱藥治寒
寒既甚必反格拒而不入故於前方中加人
尿豬膽之陰以引陽藥入陰經曰逆者從之
此之謂也無脈者言診之而欲絕也服湯後
更診其脈若暴出者如燭燼焰高故主死若

其脈徐徐微續而出則是真陽漸回故可生也故上條所以纔見下利卽用白通以治於未形誠善法也

集註

程知曰此言陰盛格陽用膽汁通陰法也以白通與之宜乎陽可救今乃利不止反至厥逆無脈則陰邪愈無忌矣乾嘔而煩則陽藥在膈而不入陰矣此非藥不勝病乃無鄉導之力也加人尿猪膽之陰寒則可引薑附之溫入格拒之寒而調其逆此內經從治之法

也

程應旂曰岷暴出者死無根之陽驟逆諸外也微續者生陽氣漸交陰肯納也

白通加猪膽汁湯方

葱白 四莖

乾薑 一兩

附子 一枚生去皮破八片

人尿 五合

猪膽汁 一合

已上三味以水三升煮取一升去滓內膽汁

人尿和令相得分溫再服若無膽亦可用

方解

是方即前白通湯加人尿猪膽汁也加尿膽者從其類也下咽之後冷體既消熱性便發情且不違而致大益則二氣之格拒可調上下之陰陽可通矣

少陰病欲吐不吐心煩但欲寐五六日自利而渴者屬少陰也虛故引水自救若小便色白者少陰病形悉具小便白者以下焦虛有寒不能制水故令色白也

註

少陰病欲吐不吐心中煩但欲寐五六日自

利而渴者此屬少陰傳邪寒熱俱有之證也
若是少陰熱而燥乾引水之渴小便必色赤
乃少陰燥不能生津下焦有熱也今爲少陰
虛而引水自救之渴故小便則色白是少陰
虛冷不能化液下焦有寒也於此可知少陰
病形悉具而渴者有寒熱二端之別也

集註

成無已曰欲吐不吐心煩者表邪傳裏也若
腹滿痛則屬太陰此但欲寐則知屬少陰五

六日邪傳少陰之時若自利不渴寒在中焦

屬太陰也此自利而渴爲寒在下焦屬少陰也腎虛水燥故渴欲引水自救下焦虛寒故小便色白下利而渴小便色白非裏熱可知矣

方有執曰此反覆申明曉人勿認煩渴均爲熱證以致悞之意

程應旄曰煩證不盡屬少陰故指出但欲寐來渴證不盡屬少陰故指出小便白來結以下焦虛有寒教人上病治在下也蓋上虛而

無陰以濟總由下虛而無陽以溫也二虛字
皆由寒字得來又曰吐利而渴與猪苓湯證
同其別在但欲寐且猪苓證小便必不利而
色赤飲水與白頭翁證同彼曰以有熱故也
小便亦必不白

林瀾曰欲吐不吐心煩陽虛格越於上但欲
寐自利小便白裏之真寒已深要知此渴與
口燥舌乾之渴不同若兼腹滿便閉譫語諸
證自當作陽邪傳裏治之既裏虛自利小便

白其爲虛寒明甚特曰下焦者足見陰旣盛
於下陽必格於上豈可以煩渴而誤攻其熱
哉

汪琥曰以全文觀之大似熱證惟小便色白
知爲真寒之證此但欲寐與熱邪不同其寐
必不昏濁其呼吸必促而細曰屬少陰者以
別其非陽邪之渴乃內無津液引水自救之
渴試以冷水飲之必不多也細察其小便若
色白者此少陰虛寒之證悉具也非熱邪可

知矣

沈明宗曰此少陰虛寒似乎熱證之辨也世
但知四肢厥逆爲虛寒證詎知小便色白乃
爲的驗乎

吳人駒曰陽明之欲吐則不得寐在少陰則
但欲寐引此以爲盛虛之別

少陰病飲食入口則吐心中溫溫欲吐復不能吐
始得之手足寒脈弦遲者此胸中實不可下也當
吐之若膈上有寒飲乾嘔者不可吐也當溫之宜

四逆湯

按

溫溫當是噤噤噤噤者乃吐飲之狀也

註

此承上條欲吐不吐詳別脈證以明其治也

飲食入口卽吐且心中噤噤欲吐復不能吐
惡心不已非少陰寒虛吐也乃胸中寒實吐
也故始得之脈弦遲弦者飲也遲者寒也而
手足寒者乃胸中陽氣爲寒飲所阻不能通
於四肢也寒實在胸當因而越之故不可下
也若膈上有寒飲但乾嘔有聲而無物出此

爲少陰寒虛之飲非胃中寒實之飲也故不
可吐惟急溫之宜四逆湯或理中湯加丁香
吳茱萸亦可也

集註

程如曰此言少陰飲吐爲腎邪上逆當溫不
當吐也欲吐不吐陰邪上逆之證也若始得
病時邪未深入其手足但寒而不厥脈但弦
遲而不沉細則爲邪實胸中寒尙在表屬於
陽分當吐而不當下吐者有物嘔則無物兩
者須辨若膈上有寒飲但見乾嘔而不能吐

出則是陰寒上逆當溫而不當吐也曰急瀉者明不溫則見厥逆無脈諸變證也

程應旄曰寒在胃中法不可下而屬實邪但從吐法一吐而陽氣得通吐法便是溫法若膈上有寒飲乾嘔者虛寒從下而上阻留其飲於胃中究非胃中之病也直從四逆湯急溫其下可矣

少陰病脈微細沉但欲臥汗出不煩自欲吐至五六日自利復煩躁不得臥寐者死

註

此發明上條互詳脈證失於急溫致變之義也脈微細沉但欲臥少陰寒也當無汗今反汗出不煩乃少陰亡陽也且自欲吐陰寒之邪上逆正當急溫失此不治因循至五六日加之自利復煩躁不得臥寐者此少陰腎中真陽擾亂外越欲絕之死證此時卽溫之亦無及矣

集註

方有執曰脈微沉細但欲臥少陰本病也汗出而不作煩熱無陽也欲吐經中之邪不退

也自利藏病進也更復煩躁不得臥寐者陽
欲絕而擾亂不寧也

程應旄曰今時論治者不至於惡寒踈臥四
肢逆冷等證疊見則不敢溫不知證已到此
溫之何及况諸證有至死不一見者則盍於
本論中之要旨一一申詳之少陰病脈必沉
而微細論中首揭此蓋已示人以可溫之脈
矣少陰病但欲臥論中又已示人以可溫之
證矣汗出在陽經不可溫在少陰宜急溫論

中又切示人以亡陽之故矣况復有不煩自
欲吐陰邪上逆之證乎則真武四逆誠不啻
三年之艾矣乃不知預爲綢繆延緩至五六
日前欲吐今且利矣前不煩今煩且躁矣前
欲臥今不得臥矣陽虛擾亂陰盛轉加焉有
不死者乎

少陰病二三日不已至四五日腹痛小便不利四
肢沉重疼痛自下利者此爲有水氣其人或欬或
小便不利或下利或嘔者真武湯主之

論中心下有水氣發熱有汗煩渴引飲小便不利者屬太陽中風五苓散證也發熱無汗乾嘔不渴小便不利者屬太陽傷寒小青龍湯證也今少陰病二三日不已至四五日腹痛下利陰寒深矣設小便利是純寒而無水乃附子湯證也今小便不利或欬或嘔此爲陰寒兼有水氣之證故水寒之氣外攻於表則四肢沉重疼痛內盛於裏則腹痛自利也水氣停於上焦胸肺則欬喘而不能臥停於

中焦胃府則嘔而或下利停於下焦膀胱則小便不利而或少腹滿種種諸證總不外乎陰寒之水而不用五苓者以非表熱之飲也不用小青龍者以非表寒之飲也故惟主以真武湯溫寒以制水也

集註

喻昌曰太陽篇中厥逆筋惕肉瞤而亡陽用真武矣茲少陰之水濕上逆仍用真武以鎮攝之可見太陽膀胱與少陰腎一藏一府同爲寒水府邪爲陽邪藉用麻桂爲青龍藏邪

爲陰邪藉用附子爲真武

真武湯方

茯苓

三兩

芍藥

三兩

生薑

三兩切

白朮

二兩

附子

一枚炮去皮破八片

右五味以水八升煮取三升去滓溫服七合

日三服

若欬者加五味子半升細辛乾薑各一兩

若小便利者去茯苓

若下利者去芍藥加乾薑二兩

若嘔者去附子加生薑足前成半斤

方解小青龍湯治表不解有水氣中外皆寒實之

病也真武湯治表已解有水氣中外皆寒虛

之病也真武者北方司水之神也以之名湯

者賴以鎮水之義也夫人一身制水者脾也

主水者腎也腎爲胃關聚水而從其類者倘

腎中無陽則脾之樞機雖運而腎之關門不

開水雖欲行孰爲之主故水無主制泛溢妄

行而有是證也用附子之辛熱壯腎之元陽
而水有所主矣白朮之苦燥建立中土而水
有所制矣生薑之辛散佐附子以補陽溫中
有散水之意茯苓之淡滲佐白朮以健土制
水之中有利水之道焉而尤妙在芍藥之酸
斂加於制水主水藥中一以瀉木使子盜母
虛得免妄行之患一以斂陽使歸根於陰更
無飛越之虞孰謂寒陰之品無益於陽乎而
昧者不知承制之理論中誤服青龍發汗亡

陽用此湯者亦此義也然下利減芍藥者以
其陽不外散也加乾薑者以其溫中勝寒也
水寒傷肺則咳加細辛乾薑者散水寒也加
五味子者收肺氣也小便利者去茯苓以其
雖寒而水不能停也嘔者去附子倍生薑以
其病非下焦水停於胃也所以不須溫腎以
行水祇當溫胃以散水佐生薑者功能止嘔
也

集解

程知曰白通通脈真武皆爲少陰下利而設

白通四證附子皆生用惟真武一證熟用者
蓋附子生用則溫經散寒炮熟則溫中去飲
白通諸湯以通陽爲重真武湯以益陽爲先
故用藥有輕重之殊乾薑能佐生附以溫經
生薑能資熟附以散飲也

張璐曰按真武湯方本治少陰病水飲內結
所以首推朮附兼茯苓生薑之運脾滲水爲
務此人所易明也至用芍藥之微旨非仲景
不能蓋此證雖曰少陰本病而實緣水飲內

蓄所以腹痛自利四肢疼重而小便反不利也若極虛極寒則小便必清白無禁矣安有反不利之理哉此證不但真陽不足真陰亦必素虧或陰中伏有陽邪所致若不用芍藥固護其陰豈能勝附子之雄烈乎

病人身大熱反欲得衣者熱在皮膚寒在骨髓也身大寒反不欲近衣者寒在皮膚熱在骨髓也

註

身體爲表藏府爲裏此以內外分表裏也皮膚爲表骨髓爲裏六府爲表五藏爲裏此以

身體之淺深藏府之陰陽分表裏也病人已
病之人也身大熱謂通身內外皆熱三陽證
也反欲得近衣者乃是假熱雖在皮膚之淺
而真寒實在骨髓之深陰極似陽證也身大
寒謂通身內外皆寒三陰證也反不欲近衣
者乃是假寒雖在皮膚之淺而真熱實在骨
髓之深陽極似陰證也

按

此以人之苦欲測其寒熱真假而定陰陽之
證也當與少陰厥陰病論中表熱裏寒裏熱

表寒脈滑而厥惡寒不欲近衣口燥咽乾等

條叅看

集註

成無已曰皮膚言淺骨髓言深皮膚言外骨

髓言內身熱欲近衣表熱裏寒也身寒不欲
近衣表寒裏熱也大抵表熱裏寒脈必沉遲
裏熱表寒脈必滑數須當辨之

鄭重光曰皮膚者骨髓之外浮淺之分也骨
髓者皮膚之內沉深之分也欲得近衣借外
以禦內此真寒也體有著而成忤不在衣之

厚薄此假寒也不察人之苦欲何以測其真
寒真熱而定標本乎

少陰病下利清穀裏寒外熱手足厥逆脈微欲絕
身反不惡寒其人面色赤或腹痛或乾嘔或咽痛
或利止脈不出者通脈四逆湯主之

註

少陰腎也腎象乎坎一陽陷於二陰之中二

陰若盛則一陽必衰陰邪始得內侵孤陽因
之而外越也下利清穀手足厥冷脈微欲絕
裏陰盛極也身反不惡寒面色反赤其外反

熱格陽於外也故雖有腹痛乾嘔咽痛等證亦當倣白通湯之法加蔥於四逆湯中以消其陰而復其陽可也

集註

程應旄曰熱因寒格無論腹痛乾嘔咽痛皆

下利中格陽之證即使利止而脈仍前欲絕

不出亦不得謂裏寒已退輒妄治其外熱也

須循四逆湯例消陰翳於下部但加蔥白宣

陽氣於下焦使陽氣通而脈亦出始為真愈

林瀾曰格拒格也亦曰隔陽陰陽隔離也又

曰戴陽浮於上如戴也夫真寒入裏陰氣未
有不盛者然其劇不過陽愈微陰愈盛耳

通脈四逆湯方

甘草

二兩
炙

乾薑

三兩強人
可四兩

附子

大者一枚
生用去皮破八片

右三味以水三升煮取一升二合去滓分溫

再服其脈即出者愈

面色赤者加葱九莖

腹中痛者去葱加芍藥二兩

嘔者加生薑二兩

咽痛者去芍藥加桔梗一兩

利止脈不出者去桔梗加人參二兩

病皆與方相應者乃服之

方解

論中扶陽抑陰之劑中寒陽微不能外達主

以四逆中外俱寒陽氣虛甚主以附子陰盛

於下格陽於上主以白通陰盛於內格陽於

外主以通脈是則可知四逆運行陽氣者也

附子溫補陽氣者也白通宣通上下之陽者

也通脈通達內外之陽者也今脈微欲絕裏
寒外熱是腎中陰盛格陽於外故主之也倍
乾薑加甘草佐附子易名通脈四逆湯者以
其能大壯元陽主持中外共招外熱返之於
內蓋此時生氣已離亡在俄頃若以柔緩之
甘草爲君何能疾呼外陽故易以乾薑然必
加甘草與乾薑等分者恐渙漫之餘薑附之
猛不能安養元氣所謂有制之師也若面赤
者加蔥以通格上之陽腹痛者加芍藥以和

在裏之陰嘔逆者加生薑以止嘔咽痛者加
桔梗以利咽利止脈不出氣少者俱倍人參
以生元氣而復脈也

少陰病吐利手足不逆冷反發熱者不死脈不至
者灸少陰七壯

註

少陰吐利法當逆冷今不逆冷反發熱者是
陽未衰故曰不死若脈不至雖有外熱恐是
假熱須防陽脫宜急灸少陰速通其陽則脈

可復也

集註

程知曰前條通脈四逆湯是裏寒外熱手足逆冷而脈不至者也此條用灸法是裏寒外熱手足不逆冷而脈不至者也少陰動脈在足內踝

喻昌曰前條背惡寒之證灸後用附子湯陰寒內凝非一灸所能勝也此條手足反熱祇是陰內陽外故但灸本經引之內入不必更用溫藥也

汪琥曰經云腎之原出於太谿灸少陰七壯

當灸太谿二穴在內踝後跟骨動脈陷中

少陰病吐利手足逆冷煩躁欲死者吳茱萸湯主

之

註

名曰少陰病主厥陰藥者以少陰厥陰多合

病證同情異而治別也少陰有吐利厥陰亦

有吐利少陰有厥逆厥陰亦有厥逆少陰有

煩躁厥陰亦有煩躁此合病而證同者也少

陰之厥有微甚厥陰之厥有寒熱少陰之煩

躁則多躁厥陰之煩躁則多煩蓋少陰之病

多陰盛格陽故主以四逆之薑附逐陰以回
陽也厥陰之病多陰盛鬱陽故主以吳茱萸
之辛烈迅散以通陽也此情異而治別者也
今吐而不吐虺手足厥冷故以少陰病名之
也蓋厥冷不過肘膝多煩而躁欲死故屬厥
陰病主治也所以不用四逆湯而用吳茱萸
湯也

集註

程知曰吐利陰邪在裏土干脾胃也厥冷陽
不溫於四肢也煩而躁則陰盛之極至於陽

氣暴露擾亂不寧也證至此幾瀕危矣非茱
萸之辛溫無以降陰氣之上逆非人參薑棗
之甘溫無以培中土而制腎邪也躁煩與煩
躁亦有別躁者陰躁煩者陽煩躁煩者言自
躁而煩是陰邪已外逼也煩躁者言自煩而
躁是陽氣猶內爭也其輕重淺深之別學者
宜詳審之

程應旌曰溫法原爲陰寒而設故真寒類多
假熱凡陰盛格陽陰證似陽等皆少陰蠱惑

人耳目處須從假處勘出真來方不爲之牽
制如吐利而見厥冷是胃陽衰而腎陰併入
也誰不知爲寒者顧反見煩躁欲死之證以
誑之是皆陽被陰拒而置身無地故有此象
吳茱萸湯挾木力以益火勢則土得溫而水
寒却矣

吳茱萸湯方

吳茱萸 一升

人參 二兩

生薑 一兩

大棗 十二枚

右四味以水七升煮取二升溫服七合日三服

集解

羅天益曰仲景之法於少陰則重固元陽於

厥陰則重固生氣厥陰肝木雖爲兩陰交盡而一陽之真氣實起其中此之生氣一虛則三陰濁氣直逼中上不惟本經諸證悉具將陽明之健運失職以致少陰之真陽浮露而吐利厥逆煩躁欲死食穀欲嘔種種叢生矣吳茱萸得東方震氣辛苦大熱能達木鬱直

入厥陰降其陰盛之濁氣用以爲君人參
中和正氣甘溫大補能接天真挽回性命升
其垂絕之生氣用以爲臣佐薑棗和胃而行
四末斯則震坤合德木土不害一陽之妙用
成而三陰之間無非生生之氣矣諸證有不
退者乎

方有執曰吐則傷陽利則損陰厥冷者陰損
而逆也煩躁者陽傷而亂也茱萸辛溫散寒
暖胃而止嘔人參甘溫益陽固本而補中大

棗助胃益脾生薑嘔家聖藥故四物者爲溫
中降逆之所須也

少陰病吐利躁煩四逆者死

註

此承上條互明其義以別可治不可治也此
條吐利煩躁厥逆皆與上條同一用吳茱萸
湯治之一曰死不治者何也蓋以少陰煩躁
多躁少煩躁者陰也厥陰煩躁多煩少躁煩
者陽也厥陰手足厥冷不過肘膝微陽未絕
故可治也少陰四肢逆冷不能回溫獨陰不

化故曰死也

集註

程應旄曰由吐利而躁煩陰陽離脫而擾亂可知加之四逆其陽絕矣不死何待使早知溫中寧有此乎

張璐曰此條與上條不殊何彼可治而此不可治耶必是已用溫中不愈轉加躁煩故主死耳

少陰病惡寒身踈而利手足厥冷者不治

註

此互詳上條手足逆冷不治之義也惡寒身

蹇而臥雖係少陰證而不至於死若下利不止手足逆冷不回是有陰無陽卽不吐利躁煩亦不可治也

集註

喻昌曰陰盛無陽卽用四逆等法回陽氣於無何有之鄉其不能回者多矣故曰不治

少陰病四逆惡寒而身蹇脈不至不煩而躁者死

註

此總承上三條以明不治之死證也四逆謂四肢逆冷過肘膝而不回也表陽虛故惡寒也陰主屈故蹇臥不伸也脈不至則生氣已

絕若有煩無躁是尙有可回之陽今不煩而躁則是有陰無陽故曰死也

集註

程應旄曰諸陰邪具見而脈又不至陽先絕矣不煩而躁孤陰無附將自盡也經曰陰氣者靜則神藏躁則消亡蓋躁則陰藏之神外亡也亡則死矣使早知復脈以通陽寧有此乎

少陰病下利脈微瀉嘔而汗出必數更衣反少者當溫其上灸之

注

脈微陽虛也瀉血少也必數更衣者下利勤也反少者欲下而反少也即今之陽虛血少裏急後重下利病也嘔而汗出者陰盛於內上逆而作嘔也陽虛失護故汗出也當溫其上宜灸之

集注

程應旌曰少陰病下利陽微可知乃其脈微而且澁則不但陽微而陰且竭矣陽微故陰邪逆上而嘔陰竭故汗出而勤努責一法之中既欲助陽兼欲護陰則四逆附子輩俱難

用矣惟灸頂上百會穴以溫之既可代薑附
輩之助陽而行上更可避薑附輩之辛竄而
燥下故下利可止究於陰血無傷可見病在
少陰不可以難用溫者遂棄夫溫也

汪琥曰按此條論仲景不言當灸何穴脈經
云灸厥陰俞常器之曰灸太衝皆誤郭雍曰
灸太谿雖係少陰經穴亦誤仲景曰宜溫其
上方有執曰上謂頂百會穴是也圖經云一
名三陽五會在前頂後一寸五分頂中央原

治小兒脫肛久不差可灸七壯此條亦灸之者升舉其陽以調夫陰也

少陰病下利止而頭眩時時自冒者死

註

少陰病利止若胃和能食神清氣爽是爲欲愈也今利止頭眩時時昏冒不省是氣脫神去故下利雖止仍主死也

集註

方有執曰頭眩俗謂昏暈也諸陽在頭下利止而頭眩者陽無依附浮越於外神氣散亂

故時時自冒也死可知矣

張錫駒曰此條死證全在頭眩自冒上看出
若利止而頭不眩不冒此中已和矣安能死
乎

張璐曰人身陰陽相爲依附者也陰亡於下
則諸陽之上聚於頭者紛然而動所以頭眩
時時自冒陽脫於上而主死也可見陽回利
止則生陰盡利止則死矣

汪琥曰下利止則病當愈今者反爲死候非
陽回而利止乃陽脫而利盡也

少陰病六七日息高者死

註

少陰病但欲寐息平氣和順也今息高氣促逆也凡病臥而息高氣促者多死

集註

喻昌曰六七日字辨證最細蓋經傳少陰而息高與二三日太陽作喘之表證迥殊也

程知曰腎爲生氣之源息高則真氣散走於胸中不能復歸於氣海故主死也

程應旄曰夫肺主氣而腎爲生氣之源蓋呼

吸之門也關係人之死生者最鉅息高者生

氣已絕於下而不復納故游息僅呼於上而
無所吸也死雖成於六七日之後而機自來
於六七日之前既值少陰受病何不豫爲固
護預爲隄防致令真陽渙散而無可復返乎
凡條中首旣諄諄禁汗繼卽急急重溫無非
見及此耳

魏荔彤曰七日之久息高氣逆者與時時自
冒同一上脫也一眩冒而陽升不返一息高
而氣根已剷同一理而分見其證者也故仲

景俱以死期之

少陰病脈細沉數病爲在裏不可發汗

註

少陰病但欲寐若脈細沉微是邪從寒化也

今脈細沉數乃邪從熱化也卽有發熱亦是

將轉屬陽明非若前所言少陰病始得之反

發熱脈沉不數宜麻黃附子細辛湯發汗者

可比也故曰病爲在裏不可發汗

集註

程知曰言熱邪在裏有發汗之禁也少陰之

脈微細其常也乃沉而加以數正爲熱邪

在裏之徵發汗則動經而增燥熱有奪血之變矣

鄭重光曰脈細沉而數裏有伏陽矣故曰病爲在裏乃熱邪傳裏之證斷不可發汗發汗則動經氣而有亡血之變少陰發熱脈沉是病爲在表以無裏證故可發汗若脈浮而遲表熱裏寒下利清穀是遲爲無陽病爲在裏又不得以浮爲在表而發汗也要知陰中有陽沉亦可汗陽中有陰浮亦當溫此條脈細

沉數數則爲熱沉爲在裏此陽邪入裏故以發汗而示戒也

少陰病但厥無汗而強發之必動其血未知從何道出或從口鼻或從目出者是名下厥上竭爲難

治

註

此條申明強發少陰熱邪之汗則有動血之變也少陰病脈細沉數加之以厥亦爲熱厥陰本無汗即使無汗亦不宜發汗若發其汗是爲強發少陰熱邪之汗也不當發而強發

之益助少陰之熱炎炎沸騰必動其本經之血或從口鼻或從目出是名下厥上竭下厥者少陰熱厥於下也上竭者少陰血竭於上也故爲難治

集註

張璐曰強責少陰汗而動其血勢必逆行而上出陽竅以發汗皆陽藥故也

程應旂曰五液皆主於腎強發少陰之汗周身之氣皆逆血隨奔氣之促逼而見故不知從何道而出也

沈明宗曰少陰病但厥無汗其病在裏當以
四逆散和陰散邪其病自退而厥自愈矣豈
可強發其汗耶

魏荔彤曰厥而有汗乃內寒迫陽外亡之象
故爲寒化陰邪無汗而厥則熱邪伏於裏而
不外越邪熱內耗也斯可議爲熱化陽邪無
疑矣

少陰病欬而下利譫語者被火氣劫故也小便必
難以強責少陰汗也

註

少陰屬腎主水者也少陰受邪不能主水上
攻則欬下攻則利邪從寒化真武湯證也邪
從熱化猪苓湯證也今被火氣劫汗則從熱
化而轉屬於胃故發譫語津液內竭故小便
難是皆由強發少陰之汗故也欲救其陰白
虎猪苓二湯擇而用之可耳

集註

方有執曰強責謂過求也小便與汗皆血液
也少陰少血劫汗奪血則小便爲之涸竭故

難也

少陰病下利六七日欬而嘔渴心煩不得眠者猪
苓湯主之

註凡少陰下利清穀欬嘔不渴屬寒飲也今少
陰病六七日下利黏穢欬而嘔渴煩不得眠
是少陰熱飲爲病也飲熱相搏上攻則欬中
攻則嘔下攻則利熱耗津液故渴熱擾於心
故煩不得眠宜猪苓湯利水滋燥飲熱之證
皆可愈矣

集註趙嗣真曰少陰欬而下利嘔渴心煩不眠及

厥陰下利欲飲水者是皆傳邪之熱脈必沉
細數故以黃連滑石等清利之其少陰自利
而渴欲吐不吐心中煩但欲寐小便色白者
是本經陰邪之寒也脈必沉微故以附子乾
薑溫之

汪琥曰下利欬而嘔渴心煩不得眠焉知非
少陽陽明之病然少陽陽明若見此證爲裏
實脈必弦大而長此病脈必微細故知其爲
少陰之病無疑也

林瀾曰下利則邪并於下矣其嘔而且欬何也蓋至六七日渴而心煩不眠則傳邪之上客者又盛渴則必恣飲多飲必停水是邪熱既不能解而水蓄之證復作也熱邪傳陷之下利非陰寒吐利并作之可比嘔而渴者蓋先嘔後渴爲邪欲解先渴後嘔多爲水停况又有水寒射肺爲欬之可兼察乎以是知必有挾飲於內耳

沈明宗曰黃連阿膠湯之心煩不得眠較此

條頗同而治異何也蓋此條乃少陰風熱
入陽明而致下利故以豬苓湯驅導水邪還
從膀胱而去急救胃中津液爲主彼條之心
煩不得眠而無下利乃腎水枯少故用黃連
阿膠湯滋陰清火急救腎陰爲主也

魏荔彤曰欬而咽不痛渴而口不乾則知邪
雖爲傳經而入之熱惟其有水飲相混故熱
勢不能甚肆其猛烈雖上衝爲欬嘔而不致
咽痛隔阻正津爲口渴而不致乾燥兼以心

煩不得眠於少陰但欲寐陰證中見陽證豈
非傳經之熱兼水濕者乎其所以不發黃者
以少陰病原有下利濕不能留熱不能蓄故
也由此觀之熱邪兼水飲昭然矣

少陰病四逆其人或欬或悸或小便不利或腹中
痛或泄利下重者四逆散主之

註

凡少陰四逆雖屬陰盛不能外溫然亦有陽
爲陰鬱不得宣達而令四肢逆冷者故有或
欬或悸或小便不利或腹中痛泄利下重諸

證也今但四逆而無諸寒熱證是既無可測之寒又無可下之熱惟宜疏暢其陽故用四逆散主之

集註

李中梓曰按少陰用藥有陰陽之分如陰寒而四逆者非薑附不能療此證雖云四逆必不甚冷或指頭微溫或脈不沉微乃陰中涵陽之證惟氣不宣通是以逆冷故以柴胡涼表芍藥清中此本肝膽之劑而少陰用之者爲水木同源也以枳實利七衝之門以甘草

和三焦之氣氣機宣通而四逆可痊矣

程知曰蓋傷寒以陽爲主四逆有陰進之象

下之則陽益虧陷而不出故經謂諸熱邪傳

經至於手足逆冷最難辨認謂爲寒深於裏

則無脈微欲絕之象謂爲熱深於裏則無煩

渴之證蓋祇是熱邪入結於裏而陽氣不得

順行於四肢也此證當用和解不當用寒下

故經中用劑之輕少者無如此方則其輕緩

解散之義可見矣

程應旄曰初得之四逆固非熱證亦非深寒
欬悸而或小便不利既似乎水蓄腹痛泄利
又似乎寒凝其中更兼下重一證得毋氣滯
在跌陽而經絡失宣通也耶

汪琥曰四逆散乃陽邪傳變而入陰經是解
傳經之邪非治陰寒也凡陽熱之極六脈細
弱語言輕微神色懶靜手足清溫有似陰證
而大便結小便數齒燥舌胎其熱已伏於內
必發熱也若用熱藥則內熱愈熾用涼藥則

熱被寒束而不得散法惟宜和表解肌疏通
氣血而裏熱自除此仲景四逆散所由設也

四逆散方

甘草 炙

枳實 破水漬
炙乾

柴胡

芍藥

右四味各十分搗篩白飲和服方寸匕日三
服

欬者加五味子乾薑各五分併主下利

悸者加桂枝五分

小便不利者加茯苓五分

腹中痛者加附子一枚炮令折

瀉利下重者先以水五升煮薤白三升煮取
三升去滓以散三方寸七內湯中煮取一升
半分溫再服

方解

方名四逆散與四逆湯均治手足逆冷但四
逆湯治陰邪寒厥此則治陽邪熱厥熱厥者
三陽傳厥陰合病也太陽厥陰麻黃升麻湯
甘草乾薑湯證也陽明厥陰白虎湯大承氣

湯證也此則少陽厥陰故君柴胡以疎肝之
陽臣芍藥以瀉肝之陰佐甘草以緩肝之氣
使枳實以破肝之逆三物得柴胡能外走少
陽之陽內走厥陰之陰則肝膽疎泄之性遂
而厥可通也或欬或下利者邪飲上下爲病
加五味子乾薑溫中以散飲也或悸者飲停
侮心加桂枝通陽以益心也或小便不利者
飲蓄膀胱加茯苓利水以導飲也或腹中痛
者寒凝於裏加附子溫中以定痛也或瀉利

下重者寒熱鬱結加薤白開結以疏寒熱也
集解方有執曰人之四肢溫和爲順故以不溫和
爲逆但不溫和而未至於厥冷則熱猶未深
入也故用柴胡以解之枳實以瀉之芍藥以
收之甘草以和之也

少陰病下利若利自止惡寒而蹇臥手足溫者可

治

註

少陰病惡寒厥冷下利不止者陰寒盛也今

下利能自止手足能自溫雖見惡寒蹇臥乃

陰退陽回之兆故曰可治

集註

程應旄曰少陰病下利而利自止則陰寒亦得下祛而又不致於脫雖有惡寒踈臥不善之證但使手足溫者陽氣有挽回之機故可溫而救之也

沈明宗曰手足溫者乃真陽未離急用白通四逆之類溫經散寒則邪退而真陽復矣故曰可治

少陰病惡寒而踈時自煩欲去衣被者可治

註
少陰病惡寒而踰陰寒證也若時自煩欲去
衣被者此陽回陰退之徵故曰可治

少陰病得之二三日以上心中煩不得臥黃連阿
膠湯主之

註

此承上條以出其治也少陰病得之二三日
以上謂或四五日也言以二三日少陰之但
欲寐至四五日反變爲心中煩不得臥且無
下利清穀欬而嘔之證知非寒也是以不用
白通湯非飲也亦不用豬苓湯乃熱也故主

以黃連阿膠湯使少陰不受燔灼自可愈也

集註程知曰二三日邪在少陰四五日已轉屬陽

明故無嘔利厥逆諸證而心煩不得臥者是

陽明之熱內擾少陰故不欲寐也當以解熱

滋陰爲主治也

黃連阿膠湯方

黃連 四兩

黃芩 二兩

芍藥 二兩

雞子黃 二枚

阿膠 三兩

右五味以水六升先煮三物取二升去滓內
膠烱盡小冷內雞子黃攪令相得溫服七合
日三服

集解

柯琴曰此少陰之瀉心湯也凡瀉心必藉連
芩而導引有陰陽之別病在三陽胃中不和
而心下痞鞭者虛則加參甘補之實則加大
黃下之病在少陰而心中煩不得臥者既不
得用參甘以助陽亦不得用大黃以傷胃也
故用芩連以直折心火用阿膠以補腎陰雞

子黃佐苓連於瀉心中補心血芍藥佐阿膠
於補陰中斂陰氣斯則心腎交合水升火降
是以扶陰瀉陽之方而變爲滋陰和陽之劑
也是則少陰之火各歸其部心中之煩不得
眠可除矣經曰陰平陽秘精神乃治斯方之
謂歟

少陰病下利咽痛胸滿心煩猪膚湯主之

註

身溫腹滿下利太陰證也身寒欲寐下利少

陰證也身熱不眠咽痛熱邪也身寒欲寐咽

痛寒邪也今身寒欲寐下利咽痛與胸滿心
煩之證並見是少陰熱邪也少陰之脈循喉
嚨其支者從肺出絡心注胸中是以少陰之
熱邪上逆則所過之處無不病也以豬膚湯
主之解少陰上焦之熱兼止下焦之利也

集註

喻昌曰下利咽痛胸滿心煩此少陰熱邪充
斥上下中間無所不到寒下之藥不可用矣
故立豬膚湯一法也蓋陽微者用附子溫經
陰竭者用豬膚潤燥溫經潤燥中同具散邪

之義也

猪膚湯方

猪膚 一斤

右一味以水一斗煮取五升去滓加白蜜一升白粉五合熬香和令相得溫分六服

方解猪膚者乃革外之膚皮也其體輕其味鹹輕

則能散鹹則入腎故治少陰咽痛是於解熱中寓散之意也

集解成無己曰猪水畜也其氣先入腎解少陰之

客熱加蜜以潤燥除煩白粉以益氣斷利也

少陰病二三日咽痛者可與甘草湯不差與桔梗

湯

註

少陰病二三日咽痛無他證者乃少陰經客

熱之微邪可與甘草湯緩瀉其少陰之熱也

若不愈者與桔梗湯卽甘草湯加桔梗以開

鬱熱不用苦寒者恐其熱鬱於陰經也

集註

喻昌曰用甘草者和緩其勢用桔梗者開提

其邪也此在二三日他證未具故可用之若

五六日則少陰之下利嘔逆諸證皆起此法
又未可用矣

甘草湯方

甘草 二兩

右一味以水三升煮取一升半去滓溫服七
合日二服

桔梗湯方

桔梗 一兩

甘草 二兩

右二味以水三升煮取一升去滓溫分再服

少陰病咽中痛半夏散及湯主之

註

少陰病咽痛者謂或左或右一處痛也咽中痛者謂咽中皆痛也較之咽痛而有甚焉甚則涎纏於咽中故主以半夏散散風邪以逐涎也

集註

方有執曰此以風邪熱甚痰上壅而痺痛者言也故主之以桂枝祛風也佐之以半夏消痰也和之以甘草除熱也三物者是又爲咽

痛之一治法也

半夏散及湯方

半夏 洗

桂枝

甘草

炙各等分

右三味各別搗篩已合治之白飲和服方寸
七日三服若不能散服者以水一升煎七沸
內散兩方寸匕更煮三沸下火令小冷少少
嚥之半夏有毒似不當散服

少陰病咽中傷生瘡不能語言聲不出者苦酒湯

主之

註

少陰病咽痛不愈若劇者咽中為病所傷漸
乃生瘡不能言語聲音不出所必然也以苦
酒湯主之用半夏滌涎蛋清斂瘡苦酒消腫
則咽清而聲出也

集註

程知曰咽痛忌汗忌寒下故甘草桔梗苦酒
三方皆用和解之法惟半夏散及湯在前條
為辛散溫解之法也

苦酒湯方

半夏

洗破如棗核
大十四枚

雞子

一枚去黃內上苦
酒著雞子殼中

右二味內半夏著苦酒中以雞子殼置刀環
中安火上令三沸去滓少少含嚥之不差更
作三劑

集解

李杲曰大抵少陰多咽傷咽痛之證古方用
醋煮雞子主咽喉失音取其酸收固所宜也
半夏辛燥何爲用之蓋少陰多寒證取其辛
能發散一發一斂遂有理咽之功也

程知曰按卯白象天卯黃象地前黃連阿膠
湯用雞子黃義取入腎滋陰此苦酒湯用雞

子白義取入肺潤瘡也

少陰病八九日一身手足盡熱者以熱在膀胱必便血也

註

邪傳少陰不從陰化而見寒證亦不從陽化而見熱證是其人腎氣素充所以藏雖受邪留連八九日仍復傳府外散也太陽主表故一身手足盡熱若熱還衛分非汗不解熱還營分非衄不解熱甚於上則頭痛目瞑衄血熱甚於下則腹痛尿難便血理必然也凡熱

少血多瘀成血畜熱多血少熱迫其血血不
得畜今爲少陰邪熱復轉膀胱而傷營分迫
走下竅故便血也

集註

程知曰前少陰病手足不逆冷反發熱者不
死陽未全虧也此八九日一身及手足盡熱

陰盛於裏也

張璐曰少陰病難於得熱熱則陰盡陽復故

少陰篇中謂手足不逆冷反發熱者不死然

病至八九日陰邪內解之時反一身手足盡

熱少陰必無此證當是藏邪轉府腎移熱於膀胱以膀胱主表故一身及手足盡熱也膀胱之血爲少陰之熱所逼其趨必出陰竅以陰主降故也

少陰病二三日至四五日腹痛小便不利下利不止便膿血者桃花湯主之

註

少陰病二三日無陰邪之證至四五日始腹痛小便不利乃少陰陽邪攻裏也若腹痛口燥咽乾而從燥化則爲可下之證矣今腹痛

小便不利是熱瘀於裏水無出路勢必下迫
大腸而作利也倘利久熱傷其營營爲火化
血腐爲膿則爲可清之證也今下利晝夜不
止而便膿血則其熱已隨利減而下焦滑脫
可知矣故以桃花湯主之益中以固脫也

集註

成無已曰要畧云陽證內熱則溢出鮮血陰
證內寒則下紫黑如豚肝也

喻昌曰治下必先固中中氣不下墜則滑脫

無源而自止註家見用乾薑謂是寒邪傷胃

不知熱邪挾少陰之氣填塞胃中故少佐乾薑之辛以散之也

程知曰此下利膿血之治法也腹痛小便不利少陰熱邪也而下利不止便膿血則證爲傷血且有中氣下脫之虞矣故用桃花湯固腸止利也

魏荔彤曰此證乃熱在下焦而熏蒸中焦使氣化因熱鬱而不行大便因熱盛而自利也久而下利不止將腸胃穢濁之物如膿帶血

盡隨大便而下熱一日不消利一日不止也
沈明宗曰此邪挾內濕凝滯血分則便膿血
也

桃花湯方

赤石脂

一斤一半全用一半篩末

乾薑

一兩

糯米

一升

右三味以水七升煮米令熟去滓溫服七合

內赤石脂末方寸七日三服若一服愈餘勿

服

方解

少陰寒邪多利清穀少陰熱邪多便膿血日久不止關門不固下焦滑脫矣此方君以體膏性濇之石脂養腸以固脫佐以味甘多液之糯米益氣以滋中則雖下利日久中虛液枯未有不愈者也其妙尤在用乾薑少許其意不在溫而在散火鬱借此以開膿血無由而化也若一服愈餘勿服以其粘濇之性甚也

少陰病下利便膿血者桃花湯主之

註

少陰病諸下利用溫者以其證屬虛寒也此少陰下利便膿血者是熱傷營也而不徑用苦寒者蓋以日久熱隨血去腎受其邪關門不固也故以桃花湯主之

少陰病下利便膿血者可刺

註

少陰病下利便膿血用桃花湯不止者熱瘀於陰分也則可刺本經之穴以洩其熱熱去則膿血自止矣

集註 張璐曰先下利日久而後便膿血則用桃花

湯若不先下利而下利便膿血則可刺經穴
若刺經穴不愈則當從事白頭翁湯設更咽
乾心煩不得眠則又須黃連阿膠湯爲合法
也

林瀾曰刺者瀉其經氣而宣通之也下利便
膿血旣主桃花湯矣此復云可刺者如痞證
利不止復利其小便與五苓散以救石脂禹
餘糧之窮故此一刺亦以輔桃花湯之所不

速也

少陰病得之二三日口燥咽乾者急下之宜大承氣湯

註

邪至少陰二三日卽口燥咽乾者必其人胃火素盛腎水素虧當以大承氣湯急瀉胃火以救腎水若復遷延時日腎水告竭其陰必亡雖下無及矣

集註

成無已曰與大承氣湯急下之以全腎衛也

經云三陰經受病已入於府者可下而已則是上條少陰病乃入府證也少陰邪熱已轉

屬於府胃府實熱消灼腎之故口燥咽乾用
大承氣以瀉府而實熱自除且少陰之藏本
腎屬水胃府屬土瀉土所以救水也

方有執曰口燥咽乾者少陰之脈循喉嚨挾
舌本邪熱客於其經而腎水爲之枯竭也然
水乾則土燥土燥則水愈乾所以急於下也
張璐曰按少陰急下三證一屬傳經熱邪亢
極一屬熱邪轉入胃府一屬溫熱發自少陰
皆刻不容緩之證故當急救欲絕之腎水與

陽明急下三法同源異派

汪琥曰少陰病得之二三日者非纔得病二三日卽口燥咽乾謂少陰口燥咽乾之病已得之二三日也

少陰病自利清水色純青心下必痛口乾燥者急下之宜大承氣湯

註

少陰病自利清水謂下利無糟粕也色純青謂所下者皆污水也下無糟粕純是污水此屬少陰實熱所以心下必痛口燥咽乾其爲

少陰急下之證無疑矣故當急下之宜大承
氣湯

集註

程知曰陽邪熱結口必乾燥設繫陰邪口中
和而不燥矣故宜急下之以救陰也

沈明宗曰邪傳陽明必俟大便堅鞭而攻下
者迺未傷胃中津液之謂此利清水因少陰
邪熱熾盛乘逼胃中津液頃刻勢已瀕危不
得不以通因通用急奪而救胃腎將絕之陰

也

少陰病六七日腹脹不大便者急下之宜大承氣

湯

註

少陰病六七日腹脹不大便者蓋因其人陽氣素盛胃有宿食故也所以傳邪已入少陰復轉屬陽明而成胃實故宜大承氣湯急下之也

集註

張璐曰少陰之證自利者最多虛寒則下利清穀虛熱則下利膿血故多用溫補傳經陽邪內結則自利純青水溫熱病則自利煩渴

並宜下奪清熱此以六七日不大便而腹脹
可見邪熱轉歸陽明而爲胃實之證所以宜
急下也

少陰中風脈陽微陰浮者爲欲愈

註

少陰中風脈若見陽浮陰弱乃風邪傳入少
陰則是其勢方盛未易言愈今陽脈反微陰
脈反浮陽微則外邪散而表氣和陰浮則裏
氣勝而邪外出故爲欲愈也

少陰病欲解時從子至寅上

註

子丑寅陽生漸長之候也病在少陰而解於陽生之際所謂陽進則陰退陰得陽而邪自解也少陰所重在真陽從可見矣

音切

踈 音拳